

Headlines

- 1 प्रधानमंत्री नरेंद्र मोदी होरें आखेआ ऐ जे महिलाएं गी ड्रोन दीदी दा दर्जा देइए उस गलत सोच ते नजरिए गी खत्म कीता गेआ ऐ जे महिलां ट्रैक्टर तगर नेई चलाई सकदिआं, अज्ज महिला कृषि क्षेत्र ते राष्ट्र निर्माण च महत्वपूर्ण योगदान देआ'रदियां न।
- 2 विदेश मंत्री एस. जयशंकर होरें आखेआ ऐ जे चीन दा मकाबला करने लेई भारत माल तैयार करने आहले अपने खेत्तर गी मजबूत करना होग, कीजे चीन कोला चनौती शड़ी बन्ने पर गै नेई आर्थिक खेत्तर च बी ऐ।
- 3 चुनाव आयोग नै दस्सेआ ऐ जे जम्मू-कश्मीर दिएं 5एं लोकसभा सीटें लेई चुनाव 5 गेडें च कराया जाग।
- 4 पुलस महानिदेशक आर.आर स्वैन होरें आखेआ ऐ जे जम्मू-कश्मीर पुलसै केंद्र शासित प्रदेश चा आतंकवाद दा समूलचा नाश करने दी ध्याई दी ऐ ते औंदे लोकसभा चुनाव पूरी चाल्ली सुरक्षित ढंगै सिर तोड़ चाढ़े जाडन।

<><><><><><>

PM-Summit

प्रधानमंत्री नरेंद्र मोदी होरें आखेआ ऐ जे उंदी सरकारै ग्रामीण कुडिएं गी कृषि ड्रोन दित्ते न तां जे समाज अंदर बनी दी एह सोच खत्म होए जे महिलां ट्रैक्टर बी नेई चलाई सकदियां। कल इंडिया टुडे कान्क्लेव च बोलदे होई मोदी होरें आखेआ जे नमो ड्रोन दीदी योजना दे तैहत महिला आप सहायता समूहें गी इक ज्हार ड्रोन दित्ते गेन। उनें आखेआ जे सरकार जिम्मेदारी ते जवाबदेई आले कम्में लेई चेचा करिए महिलाएं गी चुनाव करदी ऐ तां जे ओहू आर्थिक ते तकनीकी तौरा पर मतियां समर्थवान होई सकन। प्रधानमंत्री होरें आखेआ जे उंदी सरकारै पिच्छले 10एं बरें दे अपने राज दौरान इक भलेयां नमा माडल तैयार कीता ऐ जेदे च सबबनें शा पछड़े दे बेगौरे तबके दे लोके गी तरजीह दित्ती जा करदी ऐ। मोदी होरें आखेआ जे महिलाएं च कम्मै प्रति मती निष्ठा ते संजीदगी होंदी ऐ ते ड्रोन दीदियां देसै दे राई-बाई खेत्तर गी इक नमीं दिशा देडन। उनें आखेआ जे दुनिया भाएं यक्को-तक्की आली स्थिति च फसी दी रवै, भारत तेज रफ्तार कन्नै तरक्की बाढ़े दी बत्तै पर अगड़े बधदा रौहग। उनें आखेआ जे पूरा मुख भारत गी दुनिया दी त्री सबबनें शा बड़ी आर्थिक ताकत बनदे दिक्खना चाहंदा ऐ। उनें गलाया जे ओ खबरें च बने दे रौहने लेई नेई सगुआं कम्मै गी मिथे गेदे समें दे अंदर-अंदर तोड़ चाढ़ने च यकीन रखदे न। उनें दस्सेआ जे 2014 कोला पैहले मुलखे च स्टार्ट अप्स दी गिनत्री किश 100 ही पर अज्ज एहू सवा लख दा आंकड़ा पार करी चुके देन।

<><><><><><>

Jai Shankar

विदेश मंत्री डॉ. एस. जयशंकर होरें आखेआ ऐ जे चीन कन्नै मकाबले लेई भारत गी माल तैयार करने आहले अपने खेत्तर आली बक्खी मता ध्यान देने दी लोड़ ऐ। इक मीडिया समूह दे सम्मेलन च उनें आखेआ जे चीन कन्नै शड़े बन्ने सरबंधी मुद्दे गै नेई न, केई आर्थिक मुद्दे बी हैन। डा. जयशंकर होरें आखेआ जे इक तगड़ी अर्थबवस्था दे बूते पर गै चीन दा मकाबला कीता जाई सकदा ऐ। उनें गलाया जे पिच्छले इक दहाके थमां गै भारत नै अपने माल तैयार करने आहले अपने खेत्तर बक्खी ध्यान देना शुरू कीता ऐ। विदेश मंत्री होरें आखेआ जे 2020 च गलवान आले तनाजे दे बाद चीन कन्नै सरबंध मते बिगड़ी गे हे, अजेंकि तनोतनी काफी समें थमां बने दा हा। चीन कन्नै फौजी सतह दी गल्लबात बारै डा. जयशंकर होरें आखेआ जे बन्ने पर गश्त गी लेइए किश मुद्दें दा पूरी चाल्ली नबेड़ा अजे नेई होई सकेया ऐ कीजे दौनें मुखें दे बल अपने अगेत्रे मोर्चे पर डटे देन।

<><><><><><>

JK-Polls

जम्मू-कश्मीर च लोकसभा चुनांऽ 5 गेड च होंडना। जम्मू कश्मीर दे हर पार्लिमानी हल्के च बक्ख-बक्ख गेड च चुनांऽ होगा। उधमपुर लोक सभा सीट पर पैहले गेड तैहत् 19 अप्रैल गी वोट पाए जांडना। जम्मू लोकसभा सीट पर दुए गेड च 26 अप्रैल गी चुनांऽ होगा। राजौरी-अनंतनाग हल्के च 7 मई गी वोट पाए जांडना। श्रीनगर लोकसभा सीट पर चौथे गेड च 13 मई गी मतदान होगा। बारामुला हल्के च 5में गेड तैहत् 20 मई गी वोट पाए जांगना। लद्दाख लोकसभा सीट पर 5में गेड च मतदान होगा। जम्मू कश्मीर च कुल 86 लक्ख 93 ज्हार मतदाता न, जिंदे च 42 लक्ख 58 ज्हार महिला मतदाता न ते 161 थर्ड जंडर मतदाता न। मुख् चुनां आयुक्त राजीव कुमार होरें आक्खेआ ऐ जे जम्मू कश्मीर च विधानसभा चुनांऽ लोकसभा चुनांऽ दे कन्नो-कन्नी नेई करोआए जाई सकदे। नमीं दिल्ली च इक प्रेस कांफ्रेंस गी संबोधत करदे होई आक्खेआ जे जम्मू कश्मीर च विधानसभा चुनांऽ लोकसभा चुनांऽ मगरा करोआए जांगना। उनें गलाया जे दवै चुनांऽ इक्के बेल्ले करोआना जम्मू कश्मीर च सुरक्षा दे लिहाज कन्नै मुमकिन नेई ऐ।

<><><><><><>

SVEEP-Katra

जिला चुनांऽ दफ्तर रियासी पाससेआ अज्ज कटडा बस अड्डे पर इक नुक्कड नाटक दा सरिस्ता कीता गेआ। मतदाताएं गी जागरूक ते शिक्षित बनाने सरबंधी स्वीप कार्यक्रम तैहत् आयोजित इस कार्यक्रम च खरी मती गिनत्री च लोक मजूद हे। इस मौके पर इक कलाकार रिया चौहान नै आखेआबाईट.....

<><><><><><>

EC-Electoral Bonds

भारती चुनांऽ आयोग नै सुप्रीम कोर्ट दी रजिस्ट्री थमां हासल डिजिटल डेटा अज्ज अपनी वेबसाइट पर अपलोड करी दित्ता ऐ। एहू डेटा वेबसाइट www.eci.gov.in/candidate-politicalparty पर दिक्खेआ जाई सकदा ऐ। चुनांऽ आयोग नै इक बयान च आखेआ ऐ जे सुप्रीम कोर्ट दे निर्देश मुजब सियासी पार्टिं दे चुनावी बांडें सरबंधी डेटा सीलबंद लफाफें च दित्ता गेआ हा ते लफाफें गी खोले बिजन इसी सुप्रीम कोर्ट दे हवाले करी दित्ता गेआ हा। अदालतै दे 15 मार्च दे निर्देश मुजब सुप्रीम कोर्ट दी रजिस्ट्री नै एहू डेटा सील कवर च फिजिकल माध्यम यानि दस्ती हार्ड कापी ते पेन ड्राइव च चुनांऽ आयोग गी वापस करी दित्ता ऐ।

<><><><><><>

EC PWD ICON

चुनांऽ आयोग नै पैरा तीरंदाज ते अर्जुन अवार्ड विजेता शीतल देवी होरें गी पी.डब्ल्यू.डी श्रेणी दी अपनी राश्ट्री आइकन घोषित कीता ऐ। शीतल देवी होर जम्मू-कश्मीर दे किशतवाड दिआं बसनीक ना। कल दिल्ली च होए दे इक प्रदर्शनी क्रिकेट मैच दरान शीतल देवी हुंदे नांऽ दा ऐलान कीता गेआ। मुख् चुनांऽ आयुक्त राजीव कुमार ते चुनांऽ आयुक्त ज्ञानेश कुमार ते सुखबीर सिंह संधु होरें इस कार्यक्रम च शिरकत कीती। इस मौके पर चुनांऽ आयोग नै दिव्यांग ते बुजुर्ग मतदाताएं लेई इक समर्पित मतदाता गाइड जारी कीती। इस पुस्तिका च दिव्यांग ते वरिष्ठ मतदाताएं लेई उपलब्ध जारी प्रावधानें दी जानकारी दित्ती गेदी ऐ।

<><><><><><>

DGP-Swain

जम्मू-कश्मीर दे पुलस महानिदेशक आर.आर.स्वैन होरें अज्ज आखेआ ऐ जे जम्मू-कश्मीर पुलसै समूलचे केंद्र शासित प्रदेश चा आतंकवाद दा समूलचा सफाया करने दा पक्का धेइया कीते दा ऐ ते इस बारै रौं ते रणनीति पूरी चाल्ली साफ स्पष्ट ऐ। अज्ज डोडा च लोकें दिएं शकैतें दे नबेडे सरबंधी लोआए गेदे इक कार्यक्रम दे बाहरें मीडिया आलें कन्नै गल्ल करदे होई डी.जी.पी होरें आखेआ जे औंदे लोकसभा चुनांऽ पूरी चाल्ली सुरक्षत, रमानदारी ते बवस्था आले हंगै सिर करोआना इक्क महत्वपूर्ण जिम्मेदारी ऐ ते चुनांऽ आयोग नै इस बारे सख्त निदेश जारी कीते न जे चुनांऽ दौरान सुरक्षा बवस्था च कुसै चाल्ली दी कोई ठिल्ल मट्टु नेई

होनी लोडचदी। उनें आखेआ जे जम्मू-कश्मीर पुलस चुनाएं दौरान मतदाताएं, मेदवारें, चुनांऽ एजेतें ते सियासी पार्टिं दे कारकूनें गी पूरी चाल्ली सुरक्षित माहौल उपलब्ध कराग। उनें आखेआ जे इत्थे मजूद सुरक्षा कर्मिं दे अलावा एहदे च होर मते सुरक्षा बल बी इत्थे नोआए जा करदे ना।

<><><><><><>

Notorious Gangster

पुलसै जन सुरक्षा कनून तैहत इक बदमाश गी गिरफ्तार कीता ऐ। जम्मू दे एसएसपी हुंदे मार्गदर्शन तैहत गंग्याल पुलस थाने दी इक टीम नै इस बदमाश गी हिरासत च लैत्ता। ओहदी पंछान विक्रमजीत सिंह उर्फ विक्री दे तौर पर कीती गई ऐ। ओहदे खलाफ बक्ख-बक्ख पुलस थानें च 15 एफ.आई.आर दर्ज ना।

<><><><><><>

Horticulture

मैहकमा बागवाणी रामबन बागवानें गी जागरूक करने, उनेंगी फलें दा उत्पादन बधाने ते मयारी फलें गितै मता झाड़ देने आले बूहटे-पौधे ते होरनें चीजें ते सहूलतें पर 80 प्रतिशत दी रियायत देआ करदा ऐ। स्कीम तैहत मैहकमे नै रामबन, रामसू, बनिहाल ते गूल इलाके च 135 हेक्टर जिमी पर सेअऊ, खरोट, आड़ू ते होर दुए फलें दे बूहटे उपलब्ध कराइए उपलब्ध कराए जा रदे ना। इस बारे गल्ल करदे होई रामबन दे मुख् बागवानी अधिकारी अनिल कुमार गोरखा होरें आखेआ।

<><><><><><>

Ullas-Samba

नमीं शिक्षा नीति दे तैहत भारत सरकारै 2022-2027 दी अवधि लेई नव भारत साक्षरता कार्यक्रम उल्लस गी रम्भेया ऐ। एह योजना 15एं बरें यां ओहदे शा मते दी उम्मी दे जेहडे लोक साक्षर नेई हैन, उंदे पर केंद्रित होग। एहदा मकसद सब्बनें लेई शिक्षा ते सब्बनें गी साक्षर लेई शिक्षा ते सब्बनें गी साक्षर बनाना ऐ। इस्सै आधार पर समग्र शिक्षा जम्मू-कश्मीर आस्सेआ अज्ज समूलचे प्रदेश च केंद्र शासित प्रदेश स्तर दे आंकलन परीक्षा दा आयोजन कीता गेआ। जम्मू संभाग दे सांबा जिले च बी एह म्तेहान करोआया गेआ जित्थे 383 उल्लास केंद्र खडेरे गेदे हे। इस बारे स्हाडे संवाददाता नै डरैक्टर समग्र जम्मू-कश्मीर राकेश मगोत्रा हुंदे कन्नै गल्ल कीती।

<><><><><><>

Solar-Light

भारती फौज आस्सेआ रियासी जिले दे दूर-दरेडे ग्रांऽ परानकोट ते होरनें ग्राएं च सूर्य दी उर्जा कन्ने बलने आलियां लाइटां लाइए उत्थे दे लोकें गी बिजली दी सहूलतां उपलब्ध कराई जा करदी ऐ। फौज दी इक कार्रवाई प्राणकोट, सिलधार, टोट, भब्बर गाला, छपरी, ढकी कोट, ठंडी गली ते होरनें इलाकें च एह कार्रवाई आपरेशन सद्भावना तैहत कीती जा'रदी ऐ।

<><><><><><>

Kalakot

भारती फौज आस्सेआ कालाकोट राजौरी च इक मेडिकल कैंप दा सरिस्ता कीता गेआ तां जे दूर-दरेडे ग्रांऽ कालाकोट दे लोकें गी सेहत सरबन्धी दिक्खभाल ते जांच दी सुविधा हासल करोआई जाई सकै। माहिर डाक्टरें दी इक टीम नै कैंप च आए दे लोकें दी मेडिकल जांच कीती ते उनेंगी जरूरी दवाइयां उपलब्ध करोआइयां।

<><><><><><>